

Bileog Faisnéise do Mhná

Scagthástáil ceirbheacs

Cad is scagthástáil ceirbheacs ann?

Is é atá i gceist le scagthástáil ceirbheacs ná cuireadh a thabhairt do mhná scagthástáil ceirbheacs a fháil. Le linn na tástála sin, féachtar ar cé acu atá nó nach bhfuil aon athruithe ann i gcealla an cheirbheacs (muineál na broinne) agus déantar iarracht na hathruithe sin a shainaithint sula bhforbróidh siad ina n-aipse ceirbheacs (athruithe réamhailseacha). Ní tástáil i gcomhair aipse ceirbheacs í. Athraíonn cealla ceirbheacs go mall agus tógann sé cuid mhór blianta orthu forbairt ina gcealla aipse.

Is ar mhná nach bhfuil aon chomharthaí orthu atá scagthástáil ceirbheacs dírithe.

Cé na tairbhí a bhaineann le scagthástáil ceirbheacs?

Is féidir le scagthástáil ceirbheacs laghdú a dhéanamh ar an líon aipse ceirbheacs le himeacht ama. Is féidir le scagthástáil ceirbheacs luath-athruithe i gcealla do cheirbheacs a bhrath sula dtabharfaidh tú aon chomharthaí faoi deara. Má chóireáiltear na luath-athruithe cille sin, cabhraítear le forbairt aipse ceirbheacs a chosc. A luaithe a aimseofar athruithe mínormálta sna cealla, is amhlaidh is éasca a bheidh sé iad a chóireáil.

Cé na laigí a bhaineann le scagthástáil ceirbheacs?

Ní bheifear in ann aipse ceirbheacs a chosc le scagthástáil ceirbheacs i ngach cás, áfach. Cosúil le scagthástálacha eile, ní go hiomlán cruinn atá scagthástálacha ceirbheacs.

Is féidir toradh diúltach a fháil fiú amháin sa chás go bhfuil athruithe ann i gcealla an cheirbheacs (tugtar toradh bréagdiúltach air sin). Mar sin, tá sé tábhachtach go mbíonn tástálacha rialta agat agus go rachaidh tú i gcomhairle le do dhochtúir má thugann tú aon chomharthaí faoi deara.

Is féidir toradh dearfach a fháil fiú amháin sa chás nach bhfuil aon athruithe ann i gcealla an cheirbheacs (tugtar toradh bréagdearfach air sin). Más dearfach atá do thoradh, tairgfear imscrúdú níos mionsonraithe duit. Tugtar colpascópacht ar an imscrúdú sin. Is féidir go gcóireálfar mná áirithe i gcomhair mínormáltachtaí a ghlan suas leo féin.

Cén fáth ar cheart duit scagthástálacha ceirbheacs a fháil?

Má fhaigheann tú scagthástáil ceirbheacs rialta, cabhrófar le laghdú a dhéanamh ar an mbaol go bhforbróidh tú aipse ceirbheacs.

Le clár scagthástála amhail CervicalCheck, d'fhéadfaí an líon cásanna aipse ceirbheacs a laghdú faoi suas le 80% le himeacht ama.

Conas a dhéantar an scagthástáil ceirbheacs?

Tógfaidh dochtúir nó altra sampla de chealla ó do cheirbheacs. Tá seans ann go mbeidh sé sin beagáinín míchompordach, ach níor cheart go mbeadh sé pianmhar. Ní thógfaidh an scagthástáil ach cúpla nóiméad.

Seolfar an sampla chuig an tsaotharlann ansin, áit a scrúdófar faoi mhicreascóp é chun a fheiceáil an bhfuil aon athruithe ann. Ag brath ar an toradh, is féidir go dtástálfar do shampla i gcomhair ionfhabhtú HPV (papalómaivíreas daonna) freisin. Is é is HPV ann ná ionfhabhtú coiteann a scaiptear de ghnáth trí theagmháil craicinn le linn gníomhaíocht ghnéasach. Tá cuid mhór cineálacha HPV ann agus is féidir le roinnt díobh a bheith ina gcúis le hathruithe i gcealla ceirbheacs.

I bhformhór na gcásanna, is normálta atá na torthaí ar thástálacha smearaidh. Fiú amháin sa chás nach normálta atá an toradh, ní dóigh go gciallaíonn sé sin go bhfuil aipse ort.

Toiliú

Do thoiliú a thabhairt

Ní mór duit do thoiliú a thabhairt chun páirt a ghlacadh i gclár scagthástála CervicalCheck. Tá do thoiliú ag teastáil chun:

- a thaispeáint gur insíodh duit faoi scagthástáil ceirbheacs agus go dtuigeann tú na tairbhí agus na laigí a bhaineann léi; agus
- cead a thabhairt do CervicalCheck do shonraí pearsanta agus do stair scagthástála ceirbheacs a tháifeadh, a stóráil agus a chomhroinnt leo sin a sholáthraíonn an clár scagthástála.

Is le do rannpháirtíocht i gclár CervicalCheck a bhaineann do stair scagthástála ceirbheacs. I measc na faisnéise a bhíonn ar fáil inti, tá torthaí ar thástálacha smearaidh agus HPV, faisnéis faoi fhreastal ar cholpascópacht, cóireálacha, agus torthaí bithóipse.

Conas a thugtar toiliú?

Nuair a fhreastalaíonn tú ar choinne scagthástála ceirbheacs, iarrfar ort Foirm Scagthástála Ceirbheacs a shíniú. Mura féidir leat an fhoirm a shíniú, iarrfar ort do thoiliú a thabhairt ó bhéal nó trí mharc a dhéanamh ar an bhfoirm os comhair dochtúra nó altra.

Is tusa an t-aon duine a fhéadfaidh do thoiliú a thabhairt chun páirt a ghlacadh sa chlár. Ní ghlacfaimid le thoiliú a thugann duine éigin eile thar do cheann.

Conas a úsáidfidh CervicalCheck mo chuid faisnéise?

Úsáidfidh do chuid faisnéise chun:

- cuireadh a thabhairt duit freastal ar scagthástáil saor in aisce nuair a bheidh do chéad tástáil eile dlíte;
- litir a sheoladh chugat nuair a bheidh do thorthaí ar fáil; agus
- comhairle a thabhairt duit maidir leis na chéad chéimeanna eile.

Comhroinnfidh do stair scagthástála le saotharlanna, le clinicí colpascópachta agus, nuair is infheidhme, leis an gClárann Náisiúnta Aipse ionas go mbeidh taifead cruinn acu ar do stair scagthástála.

Is féidir go n-úsáidfidh an sleamhnán ó do scagthástáil chun críocha teagaisc agus chun cáilíocht chlár CervicalCheck a mheas. Is féidir go n-úsáidfidh do chuid faisnéise freisin chun cuireadh a thabhairt duit páirt a ghlacadh i dtaighde. Beidh sé de rogha agat féin páirt a ghlacadh ann nó gan páirt a ghlacadh ann. Ní thabharfaimid d'ainm in aon tuarascálacha, in aon obair theagaisc ná in aon athbheithnithe choíche.

Seiceáil go bhfuil do shonraí ceart sula síneoidh tú an fhoirm toilithe.

Saorghlao: 1800 45 45 55

Ríomhphost: info@cervicalcheck.ie

Suíomh Gréasáin: www.cervicalcheck.ie